

# MEJE PO CARTE COTACAYA PABLO TATINA, TIMOTEO TATINATSI

---

Meje yabara poxonae Pablo tamropata pitaba xua tatina, Timoteo tatinatsi

**1** <sup>1</sup>Jaco Timoteo, xan Pablon, Cristo Jesús pia peitorobi jiwi jiwana tatsin. Nacom neitoroba poxoru bapon baxua peichichipaewa. Xan Cristo Jesús pia peitorobi jiwi jiwana tatsin, tsipei Nacom bayatha peexanaexae pocotsiwa bayatha tsiyabara wuna muxu duta jiwitha. Po peyabara tsiwuna muxu dutsiwa, xua Nacom catsina jiwitha peajuntayapuswa, po peajuntayapuswa ataya tsiteca. Barapo peajuntayapuswa jiwi catsibeibinchi poxonae jiwi jume cowanteibina Cristo Jesús. <sup>2</sup>Xam, Timoteom, barapo carte cata tinatsi, xam be taxantom catsicotainchi. Xam bichocono caantobetsi. Ichichipan xua Nacom pon Waxa, iru Jesucristo, pon Wanacanamataxeinaein, baraponbe barabu amanayiya cayawenaenabe pia necaantobexaebe. Matautano baponbe nantanuweya cayabara nanta xeinaenabe pia necayawenaenexa tsanebe. Matautano ichichipan xua baponbe juntema popona caexanaena.

**Meje yabara xua Pablo yabara paeba xua Timoteo  
bewa jume cowanta ducuaenabiyaena**

<sup>3</sup>Poxonae Nacom tsipaebeiban jan tsainbinje: “Nacom, maisa juntu coyene weiweinan xua Timoteo neyawenaewam”, jan tsainbin. Barapon Nacom tanacuitan, tsipei tajuntu coyene netsipaeba xua pinae bara beta exanan. Barichi tamo susato jiwi tanacuita barapon Nacom. <sup>4</sup>Xam cayabara nanta xeineibatsi xua poxonae matha cain bichocono nesiwa wecoyam poxonae cacuenta warapatsi. Maisa be cataeinchi merawintha, yawa matababintha xua bichocono tajuntu coyene weiweinaewa tsane. <sup>5</sup>Xan nanta xeineiban xua xam bara xaniwaicha beta jume cowuntsiya poponame Nacom. Po pejume cowuntsiwa xam Nacom tsita xeiname,

barapo pejume cowũntsiwa copiya matha acue Loida, irũ ena Eunice Nacomtha tsita xeinabe, beya poxonaē xam irũ jume cowũntame. Bara beta yaputan xua xam irũ barapo pejume cowũntsi coyenewa Nacom tsita xeiname anoxuae.

<sup>6</sup>Daxota catsipaebatsi, beta najũntũ coyene tsacabare, xua yabara nanta xeiname po cui coyenewa Nacom cacata xua po cui coyeneyatha xua xanepanaya neexanaē ducuaēbiyaenexa pocotsiwa Nacom caitoroba. Barapo cui coyene bayatha Nacom cacata poxonaē canta jayabatsi. <sup>7</sup>Tsipei Nacom poxonaē naca cata pia Pejumope tũnaxũ tatsi, barapo pejumope tũnaxũ tatsi jopa jiwi junuwa cana exanaetsi. Jame Nacom naca cata barapo pejumope tũnaxũ tatsi, xua waxeinaewa tsane peayapũsũ itorobi coyenewa. Mataũtano Nacom naca cata barapo pejumope xua waxeinaewa tsane po cui coyene peantobe coyenewa xua watsita xeinaewa tsane Nacom mataũtano xuano jiwithano. Mataũtano Nacom naca cata barapo jumope xua waxeinaewa tsane po cui coyene beta penayabara nanta xeinaē coyenewa xua beta peexanaewa tsane. <sup>8</sup>Jopa aurande poxonaē yabara cueicueijam Jesucristo, pon Wanacanamataxeinaein, xua poxonaē bequein ichamonae cacui capona. Mataũtano jopa neyabara aurande xua jiwi pecũbi botha taecaewa. Baxua necana exana tayabara cueicueijeixae Jesucristo, xua jiwi catsawiya taneyabara nanta xeinaexae xua pinae abe exanan. Cui barũ jejande xua ichamonae bara canthũthũ jopojopeya atene exana, icha xan ichin xua yabara cui copatan xua bara ichamonae atene tana neexanaewa tsane. Baxua cacana exana neyabara cueicueijeixae Nacom pia pexeinya diwesi jume. Nacom cacata peayapũsũwa baxua nexa, xua jopa nejunuwiwa tsane poxonaē caatene exana. <sup>9</sup>Nacom naca capanepa abe waexanaē cuiru coyenein weya. Mataũtano Nacom naca waba xua Nacom watsita najũntũ coyene xanepana exanaewa tsainchi. Apra jopa naca wabiyo poxoru xanepanaya waexanaexaetsi. Apra jame naca waba, tsipei caena bayatha yabara nanta xeina baxua, beya poxonaē forota barapo cae pin nacue xua amanayiya pia wanaca yawenaetsi pia wanaca antobexae. Nacom naca yawena caemonae peburũya wanabarũ jinompaexae Cristo Jesustha. <sup>10</sup>Nacom naca tsita itũta pia peantobewa poxonaē itorobicatsi Jesucristo, pon Wanacacapanenebiyaēin. Bapon weraweraca cana exana po peayapũsũwa xua xota jiwi tũpa exanatsi. Mataũtano naca tsita itũta po coyenewatha xeinatsi peantũyapũsũwa, po peantũyapũsũwa ataya tsiteca wajume cowũntsixae Nacom pia pexeinya jume diwesi tatsi, po diwesi xua Jesucristo yabara.

<sup>11</sup>Nacom newaba xua tacueicueijeinexa barapo pia pexeinya diwesi jume tatsi. Mataũtano neitorobano xua tana necana exanaenexa Jesucristo pia peitorobi jiwi jiwana tatsin xua tacuidubinexa pomonae jopa judiomonae naexanaeyo. <sup>12</sup>Taexanaexae baxua, daxota atene

neexana ichamonae. Daichitha jopa aurinyo xua tayabara cueicueijiwa Cristo, poxonae bequein ichamonae atene neexana, tsipei yaputan pontha pon tajume cowantsixae xua peitacupaewatsi xua tana neyawenaewa. Bara beta yaputan xua bapon xeina peayapuswa xua tana neyawenaewa. Bapon neyawena xua tacueicueiji tsurucuaeabiyaenexa tsane pocotsiwa bayatha bapon neitoroba, beya poxonae barapo matabi tsane, po matabitha poxonae patopecaeana Jesucristo.

<sup>13</sup>Necui coyene jupaeya exana ducuaeabiya, po pecuidubiwa bichocono xanepana xua bayatha catsipaebatsi. Jume cowantsiya poponare, matautano antobeya poponde Nacom, ira jiwithano, caemonaeya peburuya wanabarü jinompaexae Cristo Jesthath.

<sup>14</sup>Cateiteichiya yawa muxuna poponde pexainyei coyenewa, po pexainyei coyenewa Nacom pia Pejumo pe tñaxu tatsi cacata, po pejumope tñaxu tatsi naca barü jinompa.

<sup>15</sup>Bayatha yaputaneme pomonae Asia nacuatha jinompa daxita barapomonae nepunapenta. Pomonae nepunapenta, barapomonae jiwana ichun pewun Figelo, ichun pewun Hermógenes. <sup>16</sup>Barabü Nacom pon jiwi Pecanamataxeinaein yabara nantanuweya nanta xeinaena pomonae Onesiforo piamonae tatsi, xua Nacom peyawenaewa tsane barapomonae. Bapon Onesiforo nejuntu tsacaba poxonae beta xanepanaya neyaweneiba. Bapon jopa neacauriyo xua jiwi pecubi botha taecaewa. <sup>17</sup>Poxonae bapon patopa Roma tomaratha bapon matowa newenawenei tsurucuaeabiya beya poxonae matapainya necaxina. <sup>18</sup>Barabü Nacom pon jiwi Pecanamataxeinaein, bapontha nantanuweya yabara nanta xeinaena peyawenaenexa tsane, poxonae po mataqueitha Nacom yabara paebina jiwi xua penatsicuentiwa xua abe peexanaexae. Xam yaputaneme bara, xua bapon neyawena nawita Efeso tomaratha.

### **Meje yabara xua Pablo yabara paeba xua ponba beta tanacuita pia pecanamataxeinaeinchi**

**2** <sup>1</sup>Xam Timoteom, be taxantom catsicotainchi. Najuntu coyene cui tsacabare xua nenanta xeinaenexa xua Nacom amanayiya jinya necayawenaewa tsane pia nacaantobexae. Nacom baxua cata exana caemonaeya peburuya jinya nenaexanaexae Cristo Jesthath.

<sup>2</sup>Pocotsiwa xua bayatha nejume taneme xua cueicueijan pin bicheito itabaratha, bapocotsiwa xuya cuidubare pebiwitha, po pebiwi xua xuya jume cowantsiya xaniwaicha cuidubina ichamonaetha pocotsiwa xua cueicueijan.

<sup>3-4</sup>Yabara barü cui copare xua bara ichamonae atene nacaexanaewa tsane, nejume cowantsixae Jesucristo icha xan ichin xua yabara cui copatan xua bara ichamonae atene tana neexanaewa tsane. Poxonae baxua exaname, xam bara juta coyene ichim icha be soldadomonaepin

ichi. Bapon ba atene exanatsi poxonae naba, xua peexanaexae pocotsiwa itorobatsi pia pentacaponaein. Soldadomonaepin ba dapocotsin aibi pon natsiexana piawa poxonae cataunxuae awiya naba exana ichamonaetha, tsipei bapon bewa baxua exanaena xua pon pentacaponaein peitorobixae.

<sup>5</sup>Barapocotsi juta coyeneya ichi, pon ba xua penaxenacaewa. Bapon jopa itacupaetsi xua xeinaena pocotsiwa pematomatsiwatsi xua poxonae bichoina cuinaepona icha jopa beta yabara exanaeyo pocotsi coyene xua peitorobi coyenewa barapo penaxenacaewa. <sup>6</sup>Pon ba bichocono nacuita pabitha bapon ba copiya bewa xeinaena xua pocotsiwa copiya penawetsiwa. <sup>7</sup>Beta yabara nanta xeinare xuaunxuae catsipaebatsi. Pon jiwi Pecanamataxeinaein cayawenaena xua yaputaename daxita.

<sup>8</sup>Jesucristo yabara nanta xeinare. Bapon Jesucristo pon naexana xua David pia pemomoxi susato jiwi jiwana tatsi, po David Israel nacuapiwi itorobiya pia pepa peewatsinchi. Bapon Jesucristo equeicha Nacom Pexanto asu exana petupaе cuiru coyene weya. Nacom pia pexeinya jume diwesi tatsi, po diwesi xua Cristo yabara, barapo diwesi cueicueijan jiwitha. <sup>9</sup>Barapo diwesi tacueicueijeixae daxota ichamonae atene neexana, beya poxonae penaintotha necuba. Xan be pocotsin xua abe bichocono taexanaein nenatsicotane. Ichitha jopa itacupaetsi xua jume yancataba Nacom Pejume Diwesi xua ajumetsurucuae pecana exanaewa tsane xua poxonae jiwi pecubi botha tana neetsixae. Tsipei awiya cataunxuae jiwi jume tane barapo diwesi. <sup>10</sup>Daxota jopa junuwinyo xua ichamonae atene tana neexanaewa, matautano bara copatan xua bara moya necana exanaena baxua. Daxota baxua bara copatan pomonae Nacom pia peitapetsi jiwi tatsi barapomonae nexa, xua barapomonae iru pecapanenebiyaenexa tsainchi xua Cristo Jesús capanenebiyaena. Poxonae barapomonae barapo diwesi xeinaena, po diwesi pecapanenebiyae coyenewa, bapoxonae muxuna xeinaena pexeinya peajuntuyapusuwa, po peajuntuyapusuwa ataya tsiteca xua Nacom pia nacuatheicha tatsi.

<sup>11</sup>Baraxue bara xainyei xua jei:

Icha copatatsi xua bara ichamonae naca atene exana wajume cowuntsixae Cristo beya poxonae naca tupa exana, icha poxonae Cristo cana ichichi, bapoxonae yawa muxuna jinompaeinchi Cristo xua pia nacuatheicha.

<sup>12</sup>Icha waxainchi awiya jume cowunta dubenanaebiyatsi xua poxonae bequein ichamonae naca atene exana, icha Cristo cana ichichi, bapoxonae barapo coyenewa yawa muxuna waxainchi Cristo, baru canamataxeinaeinchi jiwitha, waitorobiya ewatsinexa

tsane barapo jiwi.

Icha waxainchi itawetsiya yabara jeichichi  
Cristo: “Bapon jopa yaputaeinyo”, jeichichi,  
bapon xuya itawetsiya naca yabara jei tsane:  
“Bapomonaē jopa yaputaeinyo”,  
naca yabara jei tsane Cristo.

- <sup>13</sup> Icha jopa beta xaniwaicha jume cowũntsiya  
jinompaetsi, daichitha bapon cataunxuae  
exana ducuaenaēbiyaena pocotsiwa xua bayatha  
jiwi yabara paebatsi.  
Baxua exana, tsipei Nacom jopa itacũpaetsi xua  
exana pocotsiwa jopa be pia cuiyiyo tatsi.

**Meje yabara xua pon beta petanacuichin xua ichũn beta petanacuichiwatsi**

<sup>14</sup> Xuaunxuae catsipaebatsi baraxua paebare ichamonaetha yawano  
cui itorobare baraxua barapomonaē Nacom peitabaratha tatsi. Jande  
barapomonaetha: “Jopa yabara pana najume matsontsonoba exanaēinde  
xua po diwesin ichamonaē pepaebixae”, jande. Barapo penajume  
matsontsonobiwa barapo coyenewatha bapana jopa naca yawenaē.  
Barapo coyenewa saya abe cana exana pomonaetha pomonaē jume tane.  
<sup>15</sup> Exande daxita pocotsiwan pexanepanaē coyenewa xua Nacom nexa,  
xua Nacom jinya necacui taenexa xua bara beta tanacuitame Nacom.  
Bapoxonaē xam jopa nayabara acauram tsane pocotsiwa xua beta  
xaniwaicha necaunutsiya paebixaem Nacom Pejume Diwesi, po diwesi  
pejume xainyei jume. <sup>16</sup> Jopa yabara najume matsontsonoba exanaēinde  
po jumein xua pejumexaei, po jumein xua saya yabara cueicueije  
pocotsiwa xeina barapo cae pin nacuathe, po jumein xua bapana jiwi  
jopa yawenaetsi. Tsipei pomonaē bapocotsiwan paeba, eexanapona  
pocotsiwan abe peexanaē cuiru coyenewan. <sup>17</sup> Barapomonaē abeya pia  
pecuidubi coyenewan tatsi tajũ nayoyotapona, icha be ichi xua tsuweto  
xua bũpana putsuna xua beya tajũ putsuna pona. Barapocotsi coyene  
xua tajũ nayoyotapona, exanabe pon pewũn Himeneo irũ pon pewũn  
Fileto. <sup>18</sup> Baraponbe jume naitematabe pocotsiwa pexainyei coyenewa.  
Baponbe naerabiya jeibe: “Bayatha Nacom nacui weta xua asũ exana, xua  
jiwi equeicha jopa asũ peexanaewa tsainchi pomonaē bayatha werapa”,  
jei baponbe xua naeraba paebabe. Baponbe ainya muxu cana exanabe  
ichamonaetha xua barapomonaē jopa xapain pejume cowũntsiwa  
tsane Nacomtha. <sup>19</sup> Nacom pia pexainyei coyenewa, peayapusũwa, xua  
icha cui coyeneya jopa naexanaeyo. Barapon Nacom pia pexainyei  
coyenewa tatsi jeye: “Nacom pon jiwi Pecanamataxeinaein yaputane  
pomonaē piamonaexae tatsi”, jei. Mataũtano equeicha jeye: “Daxita  
pomonaē xua nawũn duba xua jei: ‘Paxan Cristobarũ pan, pon jiwi

Pecanamataxeinaein', jei, bewa barapomonaenaitematsinaabe peexanae cuiru coyenewan", jei Nacom pia pexainyei coyenewatha.

<sup>20</sup>Botha ba ichaxota pin bo, barapo bo xeina penain coroton pocotsiwa pewun oro nain, yawano icha penainwan pocotsiwa pewun plata nain. Matautano ba muxuna xeina napae coroton. Matautano ba xeina tsorobo coroton pocotsiwan be juruwaton. Po coroton xua pexeinya coroton, barapo coroton pecanamatawenonaenexa penabarū itata weiweinae matabintha. Po coroton xua saya pexeinya coroton aibi, barapo coroton pecanamatawenonaenexa daxita matabintha. <sup>21</sup>Bara jutiya ichi, icha pebin ichichipa exana xua pocotsiwa pexanepanae coyenewa pon jiji Pecanamataxeinaein nexa, bapon bewa naitematsinaabe peexanae cuiru coyenewa xua Nacom pejuntū coyene xanepana exanaenexa bapontha. Bapoxonae bapon itacupatsi xua peexanaewa daxita carepaya coyenein pocotsi coyenein Nacom tsita xanepanatsi.

<sup>22</sup>Xam naitemare pocotsi coyenewan pewowi exana xua poxonae abe exana. Exana ducuaenaebiyama pocotsiwa pexeinya juntū coyenewa. Matautano beta jume cowanta ducuaenaebiyama. Matautano antobe tsurucuaenaebiyama Nacom, matautano jiwithano. Matautano jantema popona ducuaenaebiyama. Xam itapeta napuna ponde pomona pejuntū coyene xanepanaewi poxonae Nacomtha tsipaeba pon jiji Pecanamataxeinaein. <sup>23</sup>Naitemare po peyabara najume matsontsonobiwa jopa xapain wnaeyo xua jopa xapain peyaputae coyenewiyo, tsipei xam yaputaneme xua jiji barapocotsi jumetha ba yabara naba. <sup>24</sup>Pon nama Nacom pon jiji Pecanamataxeinaein, amanaya tanacuitatsi jopa bewa bapon jume matsontsonobi tsane. Jame bewa bapon xanepanaya wnaeya exanaena xua daxita carepaya coyene cuintha daxita jiwitha. Matautano bewa bapon beta cuidubina ichamona. Matautano bapon bewa saya jantema poponaena poxonae bequein abe taexanatsi ichamona. <sup>25</sup>Matautano bapon bewa saya bewayo juntū coyene wnaeya muxuwetsina pomonaetha pomona peacuiitafaetabiwichi xua bapon xainyeya pia pecuidubiwa ichamonaetha. Matautano bapon bewa abu ewatsina xua icha metha Nacom copatsina xua barapomonae icha juntū coyene pexeinaenexa xua peauraxae xua abe exana. Matautano barapon bewa abu ewatsina xua barapomona peyaputaewa tsane pocotsiwa xua Nacom pia pexainyei coyenewa tatsi. <sup>26</sup>Poxonae baxua yaputaena, bapoxonae barapomona, pomona copiya pemuxufebiwi itacupaeinchi xua beta nanta xeinaena pejuntū coyenewatha. Barapomona yaputaena xua deta cou eexanapona pocotsiwa caurimona pia pentacaponaein tatsi jujuta, xua pocotsiwa abe peexanaewa, pocotsiwa bapon peitorobixae. Bapoxonae barapomona itacupaeinchi xua panenebiyaena bapon weya, matautano xua tamropata notarupaena xua exana pocotsiwa Nacom ichichipa.

**Meje yabara xua po coyeneya jiwi exanaena  
poxonae po matabitha opi ducuaena**

**3** <sup>1</sup>Ichichipan xua neyaputaewa tsane xua poxonae po matabintha opi dubenaena barapo matabin jiwi taayapube tsainchi. <sup>2</sup>Jiwi barapo matabintha bichocono pia coutha naantobe tsane. Barapo jiwi bichocono ꞥ pitaparatixichi tsane. Yawano matautano aebina ichamonaetha. Matautano bichocono atsaca tsaneno. Matautano biataenano ichamonaetha, matautano Nacom biataeinchi. Matautano barapomonaе jopa jume jejei tsaibi tsane paxeiwi. Matautano barapomonaе jopa wecobe jacobiya noteibiyo tsane poxonae ichamonaе catsibeiba. Matautano abe yabara nanta xeineibina pocotsiwa Nacom piawa tatsi. <sup>3</sup>Matautano piamonaе jopa tsita xeinae tsane peantobe coyenewa. Matautano ita aenae-aenei tsurubenanaebiyae tsane ichamonaetha. Matautano yopita dubenanaebiyaena xua ichamonaе pocotsiwa abe peexanaewa. Matautano jopa itacurpaе tsainchi xua najuntꞥ coyene itorobina xua xanepanaya peexanaewa tsane. Matauta barapomonaе bichocono anaepanaena xua ichamonaе beinchi. Matautano barapomonaе bichocono aichaxaibi tsane pocotsiwan xanepana. <sup>4</sup>Barapomonaе pomonaе jiwi pecaenaetsi jiwi tsane. Jopa matha copiya yabara nanta xeineibi tsane pocotsiwan xua exana. Barapomonaе pia coya nacayabara nanta xeinaena xua peainya cui jiwi tsane. Saya barapomonaе itapetsiya naitomatsina xua pocotsiwa cui xeica penaexanaewa. Barapomonaе naitematsina pocotsiwa Nacom pia pexainyei coyene tatsi. <sup>5</sup>Bequein barapomonaе xanepanaya exana dubenanaebiyaena icha be ichi xua poxonae pomonaе xaniwaicha pejume cowuntsiwi, daichitha barapomonaе jopa xaniwaicha jume cowuntsiyo xua icha juntꞥ coyene pexeinaewa tsane.

Jopa bewa bara pocotsimonaе imoxoyo napuna ponaem xua barapomonaе necuiyainwam. <sup>6</sup>Barapomonaе jiwana pomonaе bomuxuntha pateibina muxujainyabeibinchi yabuxi, po yabuxi jinompa barapo bomuxuntha, po yabuxi xua anacaura xua penacui yaputaexae xua abe exana bayatha. Barapowaxi awiya came jopa xanepanaya exanaeyo, poxoru saya exana pocotsiwa pia coutha ichichipa exana. <sup>7</sup>Barapo yabuxi jume naitaewata nawita, daxita carepaya po coyenein xua jiwi paeba, bara bequein jopa xanepanaya paebiyo. Daxota barapo yabuxi jopa itacurpaetsi xua peyaputaewa pocotsiwa xua Nacom pia pexainyei coyenewa tatsi. <sup>8</sup>Caena bayatha pon pewun Janes, irꞥ ichun pewun Jambres, baponbe mara pexeinaeinbe, baponbe cui matawentabe Moiestha, xua Moisés pia peexanae coyenewatha. Icha baponbe ichi, barichi barapomonaе yabara jume matawenta Nacom pia pexainyei coyenewa tatsi. Barapomonaе saya yabara nanta xeina nawita pocotsiwa

peabe coyenewa. Barapomonaē taseicatsi pejume cowũntsiwa, po pejume cowũntsiwa pexainyei jume. <sup>9</sup>Barapomonaē jopa beta dubenanaebiyae tsane, tsipei daxita nacuanpiwi cui yaputaena xua barapomonaē apara pomonaē jopa xanepanaya peexanaewi, icha be ichi poxonaē caena bayatha jiwi cui tane xua Janes irũ Jambres jopa beta exanaeyobe.

**Meje yabara po diwesi xua Pablo najume wetsiya  
paeba poxonaē Timoteo itorobatsi**

<sup>10</sup>Ichitha xam bara beta exanaponaē pocotsiwa tacuidubiwa. Mataũtano necui taneme xua bara beta poponan. Mataũtano necui taneme xua tacoutha yaputan pocotsiwa taexanaewa tsane Nacom nexa. Mataũtano necui taneme xua bara beta jume cowũntsiya poponan Nacomtha. Mataũtano necui taneme xua saya awiya beta jũntema poponan poxonaē bequein ichamonaē jopa xapain necana exanaeyo. Mataũtano necui taneme xua bara antobeya poponan jiwi, mataũtano Nacomtha. Mataũtano necui taneme xua bara awiya Nacom tanacuitan. <sup>11</sup>Xam yaputaneme xua jiwi bichocono abe necana exana tajume cowũntsixae Cristo. Mataũtano neyaputaneme xua jiwi bichocono atene neexana Antioquía tomaratha, Iconio tomarathano, Litra tomarathano. Ichitha pon jiwi Pia Pecanamataxeinaeinchi neyawena xua necapanepa barapomonaē pia xainya weya. <sup>12</sup>Bara xaniwaicha, daxita pomonaē ichichipa xua najũntũ coyene xanepana exana dubenanaebiya Cristo Jesustha, barapomonaē irũ atene exanaeinchi ichamonaē. <sup>13</sup>Ichitha pomonaē peajũntũcoyenebe jiwi, irũrũ pomonaē pemuxujainyabi jiwi, daxita barapomonaē bichocono abe eexanaponaena beyacaincha xua copiya. Barapomonaē muxujainyabiya canamataxeina ichamonaē, xua abe peexanaenexarũ, mataũtano xua barapo ichamonaē irũ xuya pemuxujainyabiya canamataxeinaenexa ichamonaē, xua abe peexanaenexarũ.

<sup>14</sup>Ichitha xam awiya beta exana ducuaenaebiyama pocotsiwa xua nacuidubame, xuano xua bichocono nejume cowũntsiwa. Xam bayatha yaputaneme pomonaē xua cacuiduba barapo coyenein, pomonaē pejũntũ coyene xanepanaewi. <sup>15</sup>Poxonaē pexuyotham yaputaneme Nacom Pejume Diwesi. Barapo diwesi itacũpatsi xua necacuidubiwa xua necapanepaewanexa abe jinya neexanaē cuiru coyene weya nejume cowũntsixae Cristo Jesús. <sup>16</sup>Daxita carepaya Nacom Pejume Diwesi tatsi, barapo diwesi Nacom ayapusũ diwesi exana. Daxita barapo diwesi xanepana xua jiwi pecuidubiwa tsainchi. Mataũtano daxita barapo diwesi xanepana xua jiwi yaputane peexanaenexatsi poxonaē abe exana. Mataũtano daxita barapo diwesi xanepana xua jiwi pemuxuwetsinexatsi xua xanepanaya peexanaewa tsane. Mataũtano daxita barapo diwesi xanepana xua jiwi peyawenaenexatsi xua pejũntũ coyene xanepana



dubenanaebiyaenexa Nacomtha. <sup>17</sup>Barapo diwesin jiton xanepanaya canacui weta exanatsi xua beta peexanaewa tsane pon Nacom piamonae jiwana jiton tatsi. Barapo diwesintha daxita coyenein xeina xua barapon nantawenona, pocotsi coyeneintha xua bapon Nacom petanacuitsinexatsi, daxita carepaya po penacuichiwan xanepana.

**4** <sup>1</sup>Nacom peitabaratha tatsi yawa Cristo Jesús peitabaratha tatsi, baponbe peitabaratha tatsi caitorobatsi. Bapon Cristo Jesús patopaetsica be pon jiwi itorobiya pia pepa Peewatsinchi. Mataütano bapon yabara paebina jiwi xua penatsicuentisiwa xua abe peexanaexae, pomonae xua anoxuae cataunxuae asu jinompa, iruno pomonae xua bayatha werapa. <sup>2</sup>Caitorobatsi xua cueicueijande Nacom Pejume Diwesi. Beta jume daunweya cueicueijam tsaibinde Nacom Pejume Diwesi poxonae jiwi ichichipa cajume taibina, mataütano poxonae bequein jiwi jopa ichichipaeyo xua necajume taewa. Barapomonae juntu coyene yaputane exande xua barapomonae petaseicaewatsi pejuntu coyene xanepanaewa Nacomtha. Mataütano barapomonae yabara muxuwere abe pia peexanae cuiru coyenein tatsi. Mataütano barapomonae juntu coyene cui tsacabare xua Jesucristo pejume cowuntsiwa tsainchi. Mataütano bapana barapomonae jopa tsita xeinaeinde peaitaconaewa. Mataütano bapana jopa nacui copatsim tsane xua necuidubaponaewa barapomonae, xua bequein barapomonae jopa Jesucristo pejume cowuntsiwichi taetham tsane. <sup>3</sup>Tsipei jopaena matabi poxonae po matabitha jiwi jopa jume cowuntsi tsane barapo pexainyei cuidubi jume. Barapomonae saya u jeichina po pecuidubiwi saya cuiduba pocotsiwa xua jiwi ichichipa jume tane. <sup>4</sup>Barapomonae saya naitemapenta xua aichaxaibi pejume taewa pocotsiwa pexainyei jume. Saya barapomonae u jume naitaewatsina ainya diwesin, po diwesin xua saya pejemai diwesin. <sup>5</sup>Ichitha xam dotam. Najuntu coyene babare xua neexanaeyainwa pocotsiwa barapomonae exana. Jopa junuwinde xua ichamonae poxonae caatene exanaena nejume cowuntsixae Jesucristo. Ichitha xam exana ducuaaere jinya nenacuichiwa xua Nacom pia pexeinya jume diwesi necueicueijei ducuaaetsiwa. Daxita wetsiya exanare pocotsiwa jinya netanacuichiwa Nacom.

<sup>6</sup>Bara nama imoxoyo nebexubina tajume cowuntsixae Cristo. Mataütano bara nama imoxoyo xua po mataqueitha tsane ponaein Nacom pia nacuatheicha. <sup>7</sup>Ajuntu cuiyapusya amanayaban caurimonaetha Jesucristo nexa, icha soldadomonae ichi xua poxonae amanayaba pia peaitafaetabiwichi. Bayatha nacui wetan pocotsiwa xua bayatha Nacom neitoroba, icha jiton ichi xua patopa poxonae penaxenacaewa. Mataütano jume cowuntsiya poponan Jesús, icha be pocotsi coyeneya ichi poxonae jiton beta yapu eena pocotsiwa itorobatsi pia pecanamataxeinaeinchi.

<sup>8</sup>Anoxuae ewatan po pentoma Nacom necatsina xua tajuntu coyene

xanepanaexae bapontha. Pon jiwi Pecanamataxeinaein, pon xua yatsicaewa xainyeya jiwi yabara paebatsi xua penatsicuentsiwa xua abe peexanaexae, bapon pentoma necatsina po mataqueitha poxonae bapon patopeicaena. Saya meisa jopa compa necatsi tsane, iru barichi tsainchi baxua catsibinchi pomonae wunaewatsiya ichichipa xua pia pepatopaewa tsane bapon.

### Meje yabara xua Pablo waba xua Timoteo wabatsi

<sup>9</sup>Nainya nesiwa ponde poxonae caitacupa. <sup>10</sup>Pon Demas, bapon nepunaxuba, tsipei bapon saya copei yabara cananta xeina nawita pocotsiwa po cae pin nacuathe xeina. Bapon Tesalónica tomara beya pona. Pon Crescente, bapon Galacia nacia beya pona. Pon Tito, bapon Dalmacia nacia beya pona. <sup>11</sup>Meisa pon Lucas, bapon xote baru ecan. Wenawenande Marcos, cabaru dena tsane, tsipei bapon itacupatsi xua tana neyawenaewa tsane. <sup>12</sup>Pon Tíquico bapon Efeso tomara beitorobian. <sup>13</sup>Poxonae nesiwa denam, inta carenande po paparuwa aitiyu, po paparuwa cuentan pon Carpo, bapon pia botha tatsi Troas tomaratha. Diboronno inta carenande, yawa paperanno inta carenande xua inta ainya cui pocotsiwa.

<sup>14</sup>Pon Alejandro, pon penain penacuichin, bapon inta abe exana. Pon jiwi Pecanamataxeinaein, bapon Alejandro pentoma catsinchi po pentoma po pecayabara matomatsiwatsi xua abe peexanaexae. <sup>15</sup>Dotam xua bapon, tsipei bapon aichaxaibi pocotsiwa po diwesin cueicueijeichi.

<sup>16</sup>Poxonae tacoutha nayabara jume yawenaeya cueicueijan pentacoponaewi peitabaratha, dapon aibi pon tana neyabara jume yawenaewa tsane. Daxita nepunapenta. Ichichipan xua Nacom bu jopa cabetsi tsane barapomonaetha xua tana nepunapentsixae. <sup>17</sup>Daichitha Nacom pon jiwi Pecanamataxeinaein, neyawena poxonae bequein ichamonae nepunapenta. Bapon peantuyapusuwa necata xua beta tacueicueijeinexa pijume diwesi xua pejume taewa tsane daxita pomonae jopa judiomonae naexanaeyo. Bapoxonae Nacom neyawena xua jiwi jopa necabetsiyo xua tatupaewa. <sup>18</sup>Bapon pon jiwi Pecanamataxeinaein, bapon necana exana xua tapanepaewa daxita carepaya abe peexanae cuiru coyenein weya, xua daxota patopaein pia peitorobi nacia beicha. Barabu jiwi ataya wunaewatsiya jainchina Nacomtha. Je bara ichi tsane.

### Meje yabara xua Pablo najume wetsiya paeba

<sup>19</sup>Inta jacobare powa Prisca, iru pia pebin tatsi, bapon Aquila. Iru inta jacobare pon Onesíforo piamonae matabuxuyo tatsi. <sup>20</sup>Pon Erasto bapon eca Corinto tomaratha. Pon Trófimo, bapon cuenta ponan Mileto tomaratha yaitama atene. <sup>21</sup>Juure xua patopare xua pewunaeya poxonae beya awubo tsane. Pon Eubulo, iru pon Pudente, iru pon Lino, iru powa

Claudia, irurũ daxita pomonae pejume cowũntsiwi, daxita barapomonae cajacoba.

<sup>22</sup>Barabũ Jesucristo, pon jiwi Pecanamataxeinaein cabarũ poponaena. Barabũ Nacom amanayiya cayawenaena jinya necaantobexae.

Baja Pablo.